

LA  
SIBILLE  
FRANCOISE  
PARLANT AV ROY.

---

M. DC. XX.

THE NEWBERRY  
LIBRARY

Case

F

39

.326

1620ch

## LA SYBILLE FRANCOISE

PARLANT AV ROY.

SIRE,

Comme Sybille & messagere des Cieux, ie viens à vous de la part de celuy qui estant le Souuerain Roy des Roys, Monarque supresme des Monarques & principautez du monde, qui enthosne les Roys en sa clemence & bienueillance, & les desthosne en son ire & fureur quād il luy plaist, vous annoncer deux sortes de nouuelles du tout contraires, bonnes & mauuaises: elles seront bonnes si les prenez & receuez avec le nueueu & reigle de la verité: mais elles seront mauuaises si vous les receuez souz le voile de vos passions, de vos volonteiz absolues, sans prester l'oreille à la raison, qui n'a pour guide que la iustice & la verité.

Scachez, Sire, aujourd'huy vne fois pour toutes, veu qu'il en est temps, & que le mal est à la porte de vostre cabinet, voire bien fort allumé aux quatre coins, mais helas, au milieu de ceste Empire François, qui gemit, qui fait entendre ses lamentations & iustes regrets: iusqu'aux limites estrangers, pour le desordre qui menate de ruine & desolation prochaine & vostre personne & vostre Royaume. Reueillez vous Sire, ne dormez plus: ie vous viens esueiller: ie vous aduertis, il n'y aura plus de temps desormais, le feu est allumé & l'embrasement est prochain.

Pourquoy est-ce, Sire, que Dieu vous à fait

n'aistre en la tres-illustre & incōparable ligne des Chrestiens Roys de Frāce? mais encor de cest Henry le Grand vostre Pere, la memoire des Roys du monde, pour ses rares vertus heroïques, & Royales? Pourquoy auez vous esté, oingt & Sacré Roy, sur le redouté Empire François? Pourquoy en l'aage de dix ans, Dieu vous à mis le Sceptre en la main droite, la Couronne en teste: la main de Iustice, en la gauche, & l'espée Royale au costé? pourquoy est-ce que orné de telles pieces & marques de souuerain Empire paroissez-vous au milieu de nous mortel, n'ayāt neantmoins rien qui ne soit immortel? estant l'oint de Dieu, vous ne receuez comparaison que de vous mesmes. Qui est le Roy dans le grand globe & circuit du monde qui soit Sacré d'huyle, enuoyé des Cieux? qui soit appelé Tres-chrestien, & fils aîné de l'Eglise sinō vous? mettez vous donc à nonchaloir tels benefices & telles graces que Dieu n'a desparties à aucun Roy du monde qu'à vous? considerez ces choses Sire, & cognoissez avec l'œil de la raison que vous estes Roy sur la belle France, fille bien aimée des Cieux, Royaume premier sur toutes nations, Royaume fleurissant & benit de Dieu particulièrement & d'un soin paternel qu'il luy a esslargy en tres-grande abondance miracles & merueilles ja depuis enuiron treize cens ans.

Dieu donne-il les Royaumes aux Roys pour en abuser, pour se donner du bon temps? remettre les affaires de leur Estat es mains des estrangers, voire ennemis, qui abusans, & de l'aage & de l'autorité du Roy, le traînent finale-



ment en ruïne: & n'est besoin icy d'en rechercher des exemples: l'histoire Sacrée est la prophane en produisent de gros & infinis cayers à la honte pour la posterité & des Roys & de leurs Royaumes desoléz & venus en decadence: Manassez en la sacree page, Ioaz, Olias ieunes & mal conseillez, quelles marques dignominie n'ont ils laissé? Salomon n'en dira-il rien? mais hélas, son ieune & temeraire fils Roboam, comment a il esté desponillé de dix lignees, ne lui en restant que deux, il a receu le conseil des flatteurs, des pipeurs des flagorneurs & ieunes gens pernicioeux: mesprisant les sages Conseillers que son pere luy auoit laissez & recommandez, il si est rendu ennemy de son peuple, l'a mesprisé, la foulé, & oppressé: le peuple aussi se voyant ainsi outrageusement traicté la habandonné & s'est reuolté de son obeissance, & lui a fait guerre. Vous estes dans la mesme barque, Sire, si de bonne heure n'y prenez garde: ie vous annonce ou la paix, ou la guerre, le choix est en vos mains. Qui peut & ne veut pas, ne peut pas quand il veut: tandis qu'auéz le pouuoir en main, que le bon & sage conseil des bons Conseillers & anciens, accoustumez aux affaires d'Estat & fidelles seruiteurs d'Henry le grand vostre feu Pere, est aupres de vous, gardez-le, retenez-le, ne le laissez eschapper: & remarquez que ce grand Empereur Federic a fait heureusement esclatter par-tout l'vniuers l'effect de son nom, riche de foy, monstrant que tout sont bon-heur ne consistoit qu'en vne tranquille paix durant laquelle les Princes & Rois dominant en assurance,

font aymez, benits & honorez par leurs subiects:  
lés subtils aussi florissent en tous biens.

C'est vne chose tres-dangereuse qu'une amitié  
desguisee: vous auez aupres de vous, audessus  
de vous, en vostre Cabinet & par tout ou vous  
allez trois ennemis capitaux: trois monstres ab-  
bayans: trois enchanteurs dissimulez & caute-  
leux, qui ne portent point sans cause le musc  
quant & eux: pourquoy cela, me direz vous? c'est  
pour couvrir la puanteur de leurs execrables  
vices: ha que si ce musc exterieur pouuoit estre  
l'interieur de leurs meschancetez, quel bien  
pour toy ô France: tu vois ton Roi desenchanté,  
descharmé, & les yeux ouuerts pour voir & es-  
chaper le mal qui le menace,

Laissez vous donc, Sire, conduire à la verité,  
donnez lui la Palme & serez victorieux par icel-  
le, comme ce grand Roi duquel il est parlé au 3.  
liure du voiant Esdras au 4. chapitre cestuicy ne  
voulut iamais auoir que gés vertueux aupres de  
luy aiant tousiours ceci en bouche

Vinum, Rex, mulier, cedunt simul omnia  
vero.

Le vin, le Roi, la femme sont tres-fors, mais  
verité est encor plus forte c'est à icelle que vous  
deuez retirer & chasser ces trois enchanteurs &  
trompeurs qui ont plus d'inuentions, de tours,  
de ruses & fineses que iamais eut le magicien  
Prothee: voyez vous pas que leurs meschantes  
practiques les ont tellement quindez au dessus  
des plus belles fortunes de la France, qu'il vous  
sera peut-estre impossible de les en desposseder,  
& par ce moyen ont abusé & abusent de iour en

iour de vostre bonté & de celle des François:  
le ieune serpenteau est venimeux, mais non pas  
tant que lors qu'il est deuenu grand & fort, &  
qu'il a les dents fortes & mortelles: ceux cy sont  
entrez en renards cauteleux: ils plument la pou-  
le maintenant à laise ayant gaigné le poullailler:  
& que ne feront ils desormais se voyant en la  
pleniére possession & de vostre personne, de vos  
biens particuliers, mais aussi de toute la France:  
ils ont, trompeurs qu'ils sont, enuahy & possédé  
en vn moment ce que de grands Princes, Sei-  
gneurs & Gentils-hommes ont autrefois acquis  
avec longueur de temps, & trauaux inombra-  
bles par bons & louables seruices à la Couron-  
ne qui leur deura à iamais le guerdon honora-  
ble à leurs fidelles labeurs: & ceux cy oiseleurs  
estrangers indignement esleuez en la maison  
des enfans legitimes qu'ont-ils fait? ils ont pillé,  
ils pillent encor & pilleront iusqu'au reste le  
tout si vous n'arrestez leur ardeur desmesuree  
& insupportable.

Mais qu'elle honte, Sire, quel des-honneur  
non seulement à vous, mais quel vitupere &  
ignominie honteuse à la France & à tous vos  
bons subiets qui souspirent, & voyent que vous  
estant Roi Souuerain, sans pair & compaignon  
vous soumettiez vostre puissance & vostre au-  
thorité à nul autre communicable, à trois ser-  
penteaux, à trois harpies, à trois affamez gueux  
estrangers? que vous permettiez que tels affron-  
teurs logent au dessus de vous, & soyent si im-  
pudens & temeraires de vous enuoyer dire par  
leurs semblables, si voulez monter en leur chā-

bre? qu'est-ce à dire cela, quelle mocquerie; permettrez vous long-temps tels bouffons & hapelourdiers qui se mocquent de vous, & des grands de vostre Royaume? ce que les gens de bien souz iustes & equitables demandes requierent de vostre Maieſté: ces pipeurs l'obtiennent incontinent & sans refus.

Si ce mal-heur continuë, adieu vostre France, adieu vostre Estat, adieu vostre Couronne (que Dieu ne vueille) leur audace, voire pluſtoſt leur faire & deſeſperee ambition leur donnera telles aiſſes & ſi fortes, qu'ayans vn tel pouuoir & authorité dans vostre Royaume & aupres de vous, ils voudront bien toſt deſpartir le Royaume en trois, comme dernièrement a eſté faiſt du Royaume de Boheme en l'Empire l'vn voudra auoir la Couronne, l'autre le Sceptre, l'autre l'eſpee: l'vn l'or & l'argent de vos coffres & finances, l'autre, les terres & gouuernemens, de vos Provinces, & l'autre l'authorité ſouueraine de commander par tout abſolument: & qu'aurez-vous apres tout cela? que deuiendra vostre authorité? que deuiendront vos places & vos finances? mais que diront les Princes de vostre ſang & autres qui ſont le bras fort & deſenſeur de vostre Estat? quelle contenâce tiendront ils voyâs ces affamez en leur lieu manger le pain de leur table? diſpoſer haut & bas & ſans reſpect des biens de la maiſon? & ſe voyant ainſi priuez de leurs droicts, honneurs, perminences & prerogatiues que feront-ils? ou que deuront ils faire? vous le iugerez, Sire, aiſémét, & verrez que telles choſes ne ſont que portes ouuertes a meſcō-  
tentement



tentement, à iuste cholere, mais hélas! souuent  
 a reuolte: les exemples de ceci, tant anciens que  
 modernes n'en rendent que trop de tesmoigna-  
 ge: i'en prendray vn seulement qui est du tout  
 funeste & lamétable en la personne d'un de vos  
 predecesseurs qui a esté le vingt & neuuesme  
 Roy des François & leur dernier Empereur, ça  
 esté Charles le Gros, qui pour auoir mieux ay-  
 mé l'estranger que ses propres subiects, ne tenât  
 compte d'eux n'y de l'administration des affai-  
 res de son Royaume, se vit comme en vn instât  
 la butte de tout mal-heur & d'infamie immor-  
 telle & exemplaire à ses successeurs. Il fut de-  
 gradé du Royaume & de l'Empire, & se trouua  
 seul sans vne pauvre seule maisonnette pour faire  
 sa demeure: dechassé ignominieusement de son  
 Palais & demeure Royale, & confiné honteuse-  
 ment à vn pauvre village de Suabe en Alle-  
 maigne, où il acheua ses iours en extrême diset-  
 te sans secours d'aucun: sans estre regretté de  
 personne, bref, ô misere! sans pain, sans honneur  
 & m'enuoyer, ô histoire espouuentable pour les  
 Roys! voyant Sire, & entendant tel exemple  
 permettez vous que ces trois pipeurs vous trai-  
 nent & emportent par tout où leur plaisir les  
 porte? ha! qu'ils sçauent bien que leur cas est  
 sale par deça, c'est pourquoy ils vous font eslon-  
 gner de Paris, au grand preiudice & regret de  
 vos bons & fideses seruiteurs qui languissent  
 se voyans priuez de l'agreable presence de leur  
 bon Roy & Pere, par les meschantes menees,  
 brigues & meschants rapports de ces hommes  
 pernicious, & soubz le masque faux d'une dissi-

mulée amitié enuets le Roy, se faifans tres bien payer de leurs coruées par les Efcheuins Maires & gouuerneurs des villes à vofre defcen, Sire, exigeans fecrettemēt de fommeſ enormes pour affouuir leur damnable auarice, enaigriffans par ce moyen les cœurs & les courages de vos fubiećts qui ſe voyent pincez ſi viuement par ces ſangſues alterées & enyurées du ſang de vos pauures ſubiećts qui iettent cela ſur quelque haine que leur pouuez porter. Le meſcontentement de vofre peuple, Sire, eſt grand: le murmure eſt merueilleux, tous ſe plaignent en n'entend aujourd'huy que plaintes, que propos rudes & picquants: vofre peuple ſ'eſmeut & eſt en mauuaife & finiftre opinion de vous voir abandonner vofre ville de Paris, & laiſſer à l'abandon vos ſubiets ſouz la fauſſe ſuggeſtion & finiftres rapports que ces trois pernecieux & mal-heureux hommes vous font: ne pouuans auoir lieu, temps ny occaſion de vous dreſſer leurs iuſtes plaintes comme à leur pere, ny ayās que ces trois qui tiennent vofre oreille, vofre volonteé & vofre autorité en leur main, & ne pouuez par ce moien eſtre aduertī du mal-heur euident que ces trois feront enfanter par leurs deſloyales pratiques: la deſolation eſt prochaine, & l'embraſement prochain, ceux cy y ont porté le bois, le feu & les foufflets. Sçachez, Sire, que la trop grande familiarité cauſa la totale ruine à ce grand conqueſteur de terres & Provinces, Ceſar premier Empereur des Romains: on l'aduertiſſoit de tous coſtez, prenez vous garde, vous declarez trop ouuertement vos ſe-

crets & vos entreprinſes à vos deux nepueux  
 Caſſius & Brutus, ils vous trahiront, & en ſerez  
 marry à la fin; il n'adiouſta iamais foy aux ſages  
 remonſtrances de ſes bons Conſeillers, qu'en  
 aduint-il? ſa ruine & domage: ils le tuèrent en  
 ſon ſiege de vingt & deux playes mortelles, lors  
 que moins il y penſoit: il ne faut meſpriſer les  
 ſerieux aduertillemens des hommes ſages & fi-  
 delles, & ne faire comme ce fol Roy, Architas,  
 qui eſtant aduerti de la conſpiration qui luy  
 eſtoit braſſée, il dit ſe mettant à table pour ſou-  
 per, à demain les affaires, à demain, mais il ne  
 vit pas le lendemain: car au milieu de ſon ſou-  
 per il fut poignardé, c'eſtoit bien remettre à de-  
 main les affaires: le dormir & la nonchalance  
 ſont dangereux, principalement à vn Roy, qui  
 doit toujours deſpendre plus en raiſon qu'en  
 ſa volonré propre. Ce qui vous doit plus eſmou-  
 uoir & reſueiller, Sire, c'eſt, que nō pas vn, deux  
 trois cents ou deux cents vous aduertiffent des  
 meſchantes pratiques & menees de ces trois  
 hommes eſtrangers, mais toute la France crie  
 miſericorde, Sire, tout ſe perd, vous vous per-  
 dez & nous (vox populi vox Dei) la voix du peu-  
 ple, c'eſt la voix de Dieu: les eſtrangers meſmes,  
 les Princes eſloignez s'en eſtonnent, ſont eſba-  
 his que telles gens incognus & chetifs merce-  
 naires ayent gaigné tel credit enuers vous, & ſe  
 ſoyent agrandis au deſſus des Princes & des plus  
 grands, à voſtre perte. Mais ie parle à toy, ô de-  
 ſolee France, voyant ton mal-heur quel deſa-  
 ſtre deüie ô pauvre France que tu voyes ces mal-  
 heureux ingrats: ces pernicioeux hommes te ra-

12  
uir le plus beau de ta ioye: t'enleuer ton Roy,  
& tu ne sçais ce qu'ils en feront, le faire courir  
apres leurs volonte, bref le perdre si Dieu n'a  
pitié de toy: tu les vois, mais avec tes larmes:  
comme œufs mortels esclos de Proserpine au  
milieu de tes places: mais plustost, ô grand dou-  
leur, tu les vois accompagnez & fortifiez de  
satellites de leur estoffe qui t'agnement & ton  
ieune Roy pour vous perdre & destruire. Dila-  
tione pœnas, dit le Prouerbe, (inuitamur ad ma-  
iora mala:) en differant le supplice des meschans  
on est porté à des maux nouueaux & plus grāds:  
Ha, Sire, que tres bien disoit vostre sage ayeul  
sainct Louys, que le Roy qui peut punir le mes-  
chant l'ayant recogneu tel, est aussi coupable  
que luy s'il ne le chastie, vous devez mettre en  
effect vne telle & si belle sentence, puis qu'on  
vous monstre a descouuert leurs meschancetez.

Quid leges sine moribus?) disent les Iuriscôn-  
sultes, que seruent les loix sans les mœurs? qu'est  
ce qu'une ville sans loix, vn Roy sans le sceptre  
& main de Iustice, comment, Sire, vous reco-  
gnoistra-on pour vray Roy, pour pere & proté-  
cteur de vostre peuple, si tout le premier vous  
ne portez le flambeau de vertu pour esclairez  
vostre peuple, Si vous endurez les meschans &  
pernicieux, qui vous honorera, si vous auez au-  
pres de vous des flateurs, des trompeurs & fla-  
gorneurs, qui croira que vous auez le droit  
& l'equité, qui sont marques essentielles d'un  
bon Roy, si vous endurez ces trois Appollions,  
ces trois destructeurs de vostre renommée, de  
vos biens, & du total de la France, estimez vous



qu'on die nous auons vn Roy benin & debonnaire, vn protecteur & defendeur de nos biens, enfans & vies, voicy vn mauuais coup de Roys, Sire, qui se seruent de flatteurs, de traistres & ennemis de l'Estat, on dit l'ancien Prouerbe, que ceux qui demeurent en leurs cours sont forcez & desirent viure mal-heureux.

Imitez plustost vostre sage & deuot predecesseur Clouis, qui a regné 15. ans Payen, & 15 ans Chrestien, qui ayant recogneu la verité, il la defendit tousiours avec l'espée, & se fit renommer en Iustice, Pieté, clemēce, & force, dechassa tous mauuais Conseillers & gens malins, reconnus tels, inuitez aussi ces braues Roys Iosias, Ozias, Salomon, Dauid & autres Roys, recommandez en l'Escripture sainte.

Vous florirez par Iustice, qui est la base & le fondement de toutes vertus. Lors que vous chasserez d'aupres de vous les meschās qui sous couleur feinte vous trompent & deçoient, ce sont ces trois monstres inhumains qui infectent tout par où ils passent.

Ie vous prie, Sire, pourquoy est-ce, que Ciceron au premier de ses Tusculanes appellé Rhadamante iuge d'Enfer, inexorable? parce qu'il faut les iugements sans corruption: on vous dit, & on le crie & publie par tout & de voix & des cris, on nes'en peut plus taire, que ces trois vous pillent, vous enchantent: mais helas, vous perdent & vostre pauvre France.

Vostre pauvre peuple oppressé par eux, crie, gemit, souspire, se plaint vous dresse ses complaints: seréz vous inezorable à ses iustes prie-

res: mais plustost soyez inexorable à ces trois,  
chastiez les en vostre iuste colere & iustice, sans  
leur bailler plus si longues reines. Vsez enuers  
eux de vostre iustice, laquelle doit estre comme  
la mort qui ne pardonne à petit ny à grand, à  
foible ny fort, à riche ny pauvre, bref à nul.

Ceux cy ayans mis la plume au vent, & perdu  
route honte, ne se souuient de rien, car s'ils ont  
bien osé vous tromper & enchanter, comment  
n'oseront-ils iouer des restes de la France?

Mais, Sire, hélas! finalement oubliez vous  
vostre bonne & tres-fidelle ville de Paris? aura  
elle vostre malle-grace par la tromperie & faux  
rapports de ces trois meschants hommes? Ainsi  
n'aduienne, Sire, que vous ostiez le pain de la  
main de vos enfans pour le donner aux chiens,  
aux ennemis, mercenaires & estrangers, à vostre  
France, luy ferez vous rigoureux, vostre Paris  
qui est la merueille des villes du monde, sera  
elle iniustement haye de vous son Roy & Pere,  
Paris di-ie, ville capitale de vostre Royaume?  
le Throsne sacré de la venerable & inuiolable  
Astree iustice, ou les Dieux tutelaires d'icelle  
prononcent leurs iustes arrests: mais plustost  
oracles, France qui est heureuse en mainte ma-  
nuelle, qui entouree d'espics & de raisins nour-  
rit de ses biens les siens, & ses voisins plus eslon-  
gnez. Paris encor throsne sacré & redouté de  
nos bons Roys Tres-chrestiens, viendra-elle en  
vostre haine par l'enuie de ces trois incognus,  
non: car vous estes Louys le Iuste, qui cognoi-  
strez ces pipeurs, les cognoissant, aussi vous les  
chastierez selon leurs demerites & forfaits pour

exemple & memoire à tous autres pernicleux  
qui comme ceux-cy voudroient troubler vo-  
stre repos & de vos bons subiets.

C'est l'Ambassade que i'ay eu par deuers vous,  
executez le, Sire, si desirez l'honneur de Dieu,  
qui vous a fait Roy, le bien de vostre peuple la  
ioye & contentement des gens de bien en l'ex-  
tirpation de ces trois ennemis iurez de la Fran-  
ce: les vœux de vostre bon peuple vous rendrōt  
recommandable & aymé d'un chacun, & fina-  
lement comblé de benedictions temporelles,  
spirituelles & eternelles vous iouyrez des biens  
du Ciel en la compagnie des esprits bien-heu-  
reux à iamais & auant que me despartir de vo-  
stre presence, Sire, ie fay pour vous ceste prie-  
re à celuy qui m'a enuoyé disant.

Dieu Souuerain Monarque de toutes choses,  
qui tenez les cœurs des Roys en vos mains, af-  
fermissez l'Empire de se ieune Roy vostre oingt  
que vous auez choisi, pour gouverner vostre  
fille bien-aymee la France: regardez le tousiours  
de vostre œil debonnaire, tauorisez ses com-  
mécements, rendez par tout heureuses ses sain-  
ctes entreprises, chassez de luy ce monstre à trois  
testes, qui menace son Empire de ruine: con-  
seruez en amitié les Princes du sang, la Royne  
sa Mere, Madame, Monsieur son frere, faictes  
florir la iustice au chastiment des meschans,  
(notamment de ces trois malins & pipeurs) &  
maintien des gens de bien. Exaucez les au iour  
de leurs prieres. Ainsi soit-il.

F I N.

*[Faint, illegible handwritten text, likely bleed-through from the reverse side of the page.]*

I. 506